

Allannguutissatut siunnersuut

uunga

Uunga siunnersuut Inissianik attartortitsisarneq pillugu Inatsisartut peqqussutaata allangortinneqarnera pillugu Inatsisartut inatsisaat

Pingajussaaneerinninnermut atatillugu Naalakkersuisunit saqqumminniunneqartoq.

§ 1-imut

1. Siunnersuummi qulequttap nassuiaataa imatut oqaasertalerneqassaaq:

”(Attartornermut akiligassap piffissaq akilerneqarfissaa, inissianik attartortittakkanik oqoqalersimasunik nalunaarsuineq kiisalu suliffimmut atatillugu inissianik oqoqarsimasunik innersuunneqartunik itigartitsisinnaatitaaneq)”.

2. § 1-mi aallaqqaasiineq imatut oqaasertalerneqassaaq:

”Inissianik attartortitsisarneq pillugu Inatsisartut peqqussutaanni nr. 2-mi, 12. maj 2005-imeersumi, kingullermik Ilinniartut ineqarfii pillugit Inatsisartut inatsisaanni nr. 42-mi, 12. december 2019-imeersumi § 50-ikkut allangortinneqartumi, tulliuttut allangortinneqassapput:”.

3. § 1, nr. 2-mi aallaqqaasiineq imatut oqaasertalerneqassaaq:

” § 32 kingorna qulequtaq imatut oqaasertalerneqassaaq ”*Namminersorlutik Oqartussat kommunellu inissiaataat attartortittakkat:*”

4. § 1, nr. 4, atorunnaarsinneqarpoq.

5. § 1-imi nutaatut normutut oqaasertaliunneqassapput:

”**01.** § 2, imm. 1 imatut oqaasertalerneqassaaq:

” Attartornissaq isumaqatigiissutigineqartassaaq immersugassaq Naalakkersuisunit akuerisaalluni kalaallisut qallunaatullu naqitaasoq atorlugu.”

02. § 3 imatut oqaasertalerneqassaaq:

” § **3.** Peqqussut attartornermut, immikkut inatsisiliaasunit aquaasunut atuutsinneqanngilaq, imaluunniit inissianut ukununga atuutsinneqassanani:

1) Namminersorlutik Oqartussat inissiaataannut attartortittakkanut Naalakkersuisunit ilaajunnaarsinneqarsimasunut.

2) kommunep inissiaataannut attartortittakkanut kommunalbestyrelsimit ilaajunnaarsinneqarsimasunut, taamaattorli tak. imm. 2.

3) Namminersorlutik Oqartussat kommunellu ilinniartut ilinniarnernannut atatillugu atugassiissapput, taamaattorli tak. imm. 3.

Imm. 2. Inissianut imm. 1, nr. 2-mi pineqartunut Nunap Karsianit sananeqarnerminnut tapiiffigineqarsimasunut ilaajunnaarsitsinissamut Naalakkersuisut akuersissuteqanissaat piumasqaataavoq.”

03. § 4, imm. 2-4 imatut oqaasertalerneqassaaq:

” *Imm. 2.* Peqqussut Namminersorlutik Oqartussat kommunelluunniit inissiaataanni utaqqiisaasumik sulisunut inigitinneqarallartunut tunngassuteqartunut atuutinngilaq, tamatumani apeqqutaatinnagu inissiinermut akiliuteqartitsisoqartarnersoq akiliuteqartitsisoqartannginnersorluunniit, taamaattorli tak. imm. 3 aamma 4.

Imm. 3. Namminersorlutik Oqartussani kommuneniluunniit sulisunik inissianut utaqqiisaasumik sulisunut inigitinneqarallartunut inissinneqarallartoq sullissinermut akiliummik akiliuteqartinneqarsinnaavoq, tak. imm. 2.

Imm. 4. Utaqqiisaagallartumik inigitinneqartartut aqunneqarnerat ingerlanneqarnerallu pillugit Naalakkersuisut maleruagassiorsinnaapput, matumani akiliutigineqartartussat annertussusissaat kiisalu inissiigallarnermi aningaasartuutaasut matussusiivigineqarnissaat ilanngullugit.”

04. § 5 imatut oqaasertalerneqassaaq:

” § 5. Illuutini Namminersorlutik Oqartussanit kommunenilluunniit pigineqartuni inissiat inigineqanngitsut inissarsiortunut imatut tulleriinnilersuilluni innersuunneqartassapput, inissiat:

- 1) iluarsaassinernut isaterinernullu atatillugu Namminersorlutik Oqartussat kommunellu inisseeqqinnissaannut atugassat, tak. § 68.
- 2) attartortunut iniminnik piginneqatigiilluni inissiatut pigisatulluunniit tiguserusunngitsunut, tak. § 24, imm. 1 aamma § 24 a, imm. 1.
- 3) initaartinneqarnissamik siusinnerusukkut qularnaveeqqusiiivigineqarsimasunut eqquutsitsiniarluni innersuunneqartussat, tak. § 58, imm. 4.
- 4) aapparisaq toqukkut qimagaasup atorfirmut aalajangersimasumut inigitinneqartumik qimatsinissaanut atatillugu innersuussutigineqartussat, tak. § 63, imm. 2.
- 5) aapparisaq toqukkut qimagaasup inimik innarluutilimmut immikkut aaqqissugaasumik tunniussaasimasumillu qimatsinissaanut atatillugu innersuussutigineqartussat, tak. § 63, imm. 3.
- 6) siunertanut aalajangersimasunut inniminnigaasut, tak. imm. 3.
- 7) sullissivinni sulisunut inissamut normumik atorineqanngitsumik pigisaqartunut atugassat, tak. § 9,
- 8) kommunet isumaginninnermi inissaqartitsinissaannut atugassat, tak. § 22,
- 9) nammineq kissaatigalugu nuunniartunut atugassat, tassunga ilanngullugu inigisanik paarlaannerit, tak. § 59,
- 10) utaqqisut allattorsimaffianni nalinginnaasumi allassimallutik inissarsiortunut atugassat, tak. § 6.

Imm. 2. Imm. 1, nr. 1 – 5 naapertorlugu inissiat innersuunneqartut naleqquttumik angissuseqartinniarneqassapput pitsaassuseqassallutillu. Ineqarnermut aningaasartuutit tamarmiusut

sapinngisamik inissiami qimanneqartumi aningaasartuutaasarsimasunit amerlanerunissaat pinngitsoorniarneqassaaq.

Imm. 3. Namminersorlutik Oqartussat kommuneluunniit siunertanut aalajangersimasunut atugassanik inissianik inniminniisinnaapput, tassunga ilanngullugit inissiat atorfinnut aalajangersimasunut atugassiisutigineqartussat.

Imm. 4. Naalackersuisut kommunit ataasiakkaat isumaqatiginiareerlugit inissiat imm. 1, nr. 7-10-mi taagorneqartut qanoq agguarneqarnissaat pillugu kommunenut tamanut immikkut aalajangersaasinnaapput.”

05. § 7, imm. 3 imatut oqaasertalerneqassaaq:

” *Imm. 3.* Naalackersuisut inissianik innersuussisarneq attartortitsisarnerlu, akiligassat akilersinniarneqartarnissaat akitsuutillu annertussusissaat, kiisalu utaqquisut allattorsimaffinik aqutsinissaq, taassumalu ataani utaqquisut allattorsimaffiisa inissianut sunut ataneri suussusiilu pillugit maleruagassiorsinnaapput, tak. § 5, imm. 1.”

06. §§ 9-17 imatut oqaasertalerneqassapput:

“ **§ 9.** Naalackersuisut inissianut normunik aalajangersimasunik amerlassusilinnik, sulisunut atorfeqarnermi inissiamik innersuussiffigineqarsinnaatitaasunut, tak. § 5, imm. 1, nr. 7, Namminersorlutik Oqartussat inissiaataanniit tunniussassanik agguaassisinnaapput. Inissianut normunut tunniunneqarsimasunut sulisitsisoq, inissianut normunik pigisaqartoq ukiumoortumik akiliuteqartinneqarsinnaavoq.

Imm. 2. Aammattaaq Namminersorlutik Oqartussani sulisunut inissiat aqunneqarnerinut akiliuteqartitsisoqarsinnaavoq, aqutsinermi aningaasartuutiviusunut matusissutissanik.

Imm. 3. Naalackersuisut Namminersorlutik Oqartussani sulisunut inissiat aqunneqarneri ingerlanneqarnerilu pillugit maleruagassiorsinnaapput, matumani ilanngullugit ukiumoortumik sullissinermut akitsuusiissutaasartut kiisalu allaffissornikkut aqutsinermut akitsuusiissutaasartussap angissusissaasa aalajangersaavigineqartarnissaat.

§ 10. Naalackersuisut inissianut normunik aalajangersimasunik amerlassusilinnik, sulisunut atorfeqarnermi inissiamik innersuussiffigineqarsinnaatitaasunut, tak. § 5, imm. 1, nr. 7, kommunalbestyrelsemut tunniussisinnaapput.

Imm. 2. Kommunalbestyrelsip kommunemi taassumaluunniit sullissiviini atorfillit, inissiaq kommunep inissiaataannut attartortittakkanut ilaalluni sulisunut inissianut attuumassuteqarpat, inoqutigiinni inuit amerlassusaat inimik ataatsimik sinnerlugit tunineqassanersut aalajangersinnaavaa.

Imm. 3. Kommune sulisunut inissianik agguaassinermi aqutsineq tullerriaarinermilu tunngavissat pillugit sukumiisunik aalajangersaasinnaavoq. Maleruagassat taamaattut Naalackersuisunit akuerineqassapput.

§ 11. Sulisunut naalagaaffiup sullissiviini inissiamut innersuunneqarsinnaatitaallutik atorfeqartunut inissianik innersuussisarneq pillugu danskit naalagaaffiannut Naalakkersuisut Rigsombudi aqutugalugu isumaqatigiissuteqarsinnaapput.

Imm. 2. Inissiat imm. 1-imi taaneqartut inissiap piniarneqarneraniit kingusinnerpaamik qaammatit pingasut qaangiunnerini innersuunneqartarnissaat anguniarneqartassaaq.

Imm. 3. Sullissivinni imm. 1-imi taaneqartuni sulisunut inissianik innersuussisarnissamut pisussaaffik eqqortinniarlugu Namminersorlutik Oqartussat inissianik arlalinnik inniminniisarsinnaapput.

Imm. 4. Sullissivinni imm. 1-imi taaneqartuni pisortatut sulisunut pisortanut inissianik innersuussisoqarsinnaavoq, tamanna pillugu Naalakkersuisunut aalajangersimasumik isumaqatigiissuteqarnikkut.

§ 12. Inissiat Inatsisartuni sullissivinnilu taakkununga attuumassuteqartuni sulisunut inissamik innersuunneqarsinnaatitaallutik atorfinitsitaasimasunut inissiat, kiisalu inissiat allat Inatsisartunut atorfeqartussat innersuunneqartassapput, Naalakkersuisut Inatsisartullu isumaqatigiissuteqarnerat naapertorlugu.

Imm. 2. Sullissivinni imm. 1-imi taaneqartuni sulisunut inissianik innersuussisarnissamut pisussaaffik eqqortinniarlugu, Namminersorlutik Oqartussat inissianik arlaqartunik immikkoortitassanik inniminniisarsinnaapput.

Imm. 3. Sullissivinni imm. 1-imi taaneqartuni pisortatut sulisunut pisortanut inissianik innersuussisoqarsinnaavoq, tamanna pillugu Naalakkersuisunik aalajangersimasumik isumaqatigiissuteqarneq naapertorlugu.

Imm. 4. Inatsisartuni sullissivinnilu taakkununga attuumassuteqartuni sulisunut atorfeqarnermi inissamik innersuussiffiqeqarsinnaatitaasunut, inissiat §§ 16-18-imi maleruagassat malillugit innersuunneqassapput.

§ 13. Namminersorlutik Oqartussat inissiaataat, sulisunut atorfeqarnermi inissiamik innersuussiffiqeqarsinnaatitaasunut innersuunneqartartussat sisamanut agguagaapput tulleriarinerlu una malillugu innersuunneqartassallutik:

- 1) Naalakkersuisoqarfinni ataasiakkaani naalakkersuisunut pisortanullu inissiat, tak. § 14,
- 2) Namminersorlutik Oqartussat qitiusumik allaffeqarfianni immikkoortortani pisortanut assigisaannullu, akissaateqarfik 37 tassangaanniilluunniit qaffasinnerusoq naapertorlugu akissarsiaqartinneqartunut inissiat, tak. § 15,
- 3) Namminersorlutik Oqartussat qitiusumik allaffeqarfianni allaffinni pisortanut, akissaateqarfik 36 tassangaanniilluunniit qaffasinnerusoq naapertorlugu akissarsiaqartinneqartunut inissiat, tak. § 16,
- 4) Namminersorlutik Oqartussat qitiusumik allaffeqarfianni, sullissivinni suliffeqarfinnilu tassunga atasuni kiisalu sullissivinni, suliffeqarfinni aammalu aktiaateqarluni ingerlatseqatigiiffinni Namminersorlutik Oqartussanit pigineqartuni sulisunut allanut atorfeqarnermi inissiamik innersuussiffiqeqarnissamik piginnaatitaaffeqartunut inissiat, tak. § 17.

Imm. 2. Naalackersuisut inunnut §§ 16-imi 17-imilu taaneqartunut inissianik innersuussisarneq pillugu maleruagassiorsinnaapput.

§ 14. Naalackersuisunut naalackersuisoqarfinni pisortanullu inissianik innersuussisarnissamut Namminersorlutik Oqartussat inissianik, Naalackersuisunut naalackersuisoqarfimmi pisortanullu inissiat taagorneqartunik arlaqartunik immikkoortitassanik inniminniissapput.

Imm. 2. Naalackersuisunut pisortanullu inissiat, tak. imm. 1, pingaernerutillugu tassaasassapput ilaqutariinnut ataatsinut illut imaluunniit illut affarleriit.

Imm. 3. Imm. 1-imi taaneqartunut inissianik innersuussinermi inissianut ataasiakkaanut inoqutigiinni inuit qanoq amerlatiginissaat piumasqaataaangilaq.

Imm. 4. Inissiat imm. 1-imi taaneqartut najugaqatigiiffimmut nammineq ingerlasumut, ingerlatsinermut tapiiffigineqarsinnaasumut imaluunniit ingerlatsinermi immikkut ittumik aningaasartuutitut matusissutissanik tapiiffigineqarsinnaasumut inissinneqassapput.

§ 15. Namminersorlutik Oqartussat qitiusumik allaffeqarfianni immikkoortortani pisortanut, akissaateqarfik 37 tassangaanniilluunniit qaffasinnerusoq naapertorlugu akissarsiaqartinneqartunut inissianik innersuussinissamut Namminersorlutik Oqartussat inissianik, pisortanut inissianik taaneqartartunik arlalinnik inniminniissapput.

Imm. 2. Pisortanut inissianik innersuussinermi inissiat inoqutigiinni inuit amerlassusaat, § 19 naapertorlugu naatsorsorneqartut ininik marlunnik sinnerlugit innersuussisoqarsinnaavoq.

§ 16. Namminersorlutik Oqartussat qitiusumik allaffeqarfianni allaffinni pisortanut, akissaateqarfik 36 tassangaanniilluunniit qaffasinnerusoq naapertorlugu akissarsiaqartinneqartunut inissiat § 17-imi taaneqartunit salliutinneqarlutik innersuunneqartassapput.

§ 17. Inunnut §§ 11-16-imi taaneqartunut inissianik innersuussinissamut pisariaqartinneqartut naammassineqarpata, inissiat Namminersorlutik Oqartussat qitiusumik allaffeqarfianni, sullissivinni suliffeqarfinnilu tassunga atasuni kiisalu sullissivinni, suliffeqarfinni aammalu aktiaateqarluni ingerlatseqatigiiffinni Namminersorlutik Oqartussanit pigineqartuni sulisunut allanut atorfeqarnermi inissiamik innersuussiffigineqarsinnaatitaasunut innersuunneqarsinnaapput.”

07. § 20, imm. 2 imatut oqaasertalerneqassaaq:

“ *Imm. 2.* Naalackersuisut sulisorisap soqutigisaqatigiiffik isumaqatigiinniarsinnaasooq ilaasortaaffigisaa isumaqatigiissuteqarfigisinnaavaa inissianik immikkut ittunik innersuussisarneq pillugu.”

08. § 21, imm. 4 imatut oqaasertalerneqassaaq:

“ *Imm. 4.* Imm. 1-3 naapertorlugit pisinnaatitaaffik atuutissanngilaq:

1) Inissianut Naalackersuisunut naalackersuisoqarfinni pisortanullu inniminnerneqarsimasunut, tak. § 14.

2) Pisortanut inissianut, Namminersorlutik Oqartussat qitiusumik allaffeqarfiani immikkoortortani pisortanut inniminnerneqarsimasunut, tak. § 15.

3) Inissianut siunertanut aalajangersimasunut imaluunniit atorfinnut aalajangersimasunut inniminnerneqarsimasunut, tak. § 5, imm. 3.”

09. § 24, imm. 1-2 imatut oqaasertalerneqassapput:

“ **§ 24.** Namminersorlutik Oqartussat imaluunniit kommunip inissiaataasa attartortittakkat ilaanni attartortut piginneqatigiilluni inissiaatillit peqatigiiffiannik pilersitsisimappata, aammalu inissianik attartukkaminik piginneqatigiilluni inissiatut tigusinissaminik Namminersorlutik Oqartussanut imaluunniit kommunimut qinnuteqarsimappata, attartortitsisup §§ 5-imi aamma 65-imi aalajangersakkat sanioqqussinnaavaat. Piffissamit qinnuteqarfiusumit Namminersorlutik Oqartussat imaluunniit kommunip piginneqatigiilluni inissiaatillit peqatigiiffiat inummik, piginneqatigiilluni inissiaatillit peqatigiiffiata utaqqisunut allattuiffiani allatsisimasumik inissiamut inueruttumut innersuussinissamut piginnaatissinnaavaa.

Imm. 2. Namminersorlutik Oqartussat imaluunniit kommunip attartortoq, tak. imm. 1, inissiamik najukkaminik piginneqatigiilluni inissiatut tigusinissamik kissaateqanngitsoq illoqarfimmi najukkamini inissiamik najugaata taamaaqataanik neqeroorfigissavaa. Inissiaq angissutsimigut neqeroorutip saqqummiunnerani inoqutigiinni inuit amerlassusaannut naapertuutissaaq, tak. § 6, imm. 2 aamma 3.”

010. § 24, imm. 6 imatut oqaasertalerneqassaaq:

“ *Imm. 6.* Attartorneq imm. 5 naapertorlugu ingerlatiinnarneqassappat, attartortup Namminersorlutik Oqartussanut imaluunniit kommunimut pisinnaatitaaffii atuutsinneqarsinnaasut taamaallaat tassaassapput, Namminersorlutik Oqartussat imaluunniit kommunip piginneqataasutut piginneqatigiilluni inissiaatillit peqatigiiffiannut pisinnaatitaaffigisai.”

011. § 24 a, imm. 1 imatut oqaasertalerneqassaaq:

“ Namminersorlutik Oqartussat imaluunniit kommunit illuutaanni attartortittakkani annerpaamik 16-inik inissiarqartuni attartortut affaat sinnerlugit inissiamik piginnittut peqatigiiffiannik pilersitsisimappata, aammalu inissianik attartortittakkanik inissiatut nammineq pigisatut tigusinissamik allakkatigut Namminersorlutik Oqartussanut imaluunniit kommunimut qinnuteqaateqarsimappata, attartortitsisup §§ 5-imi aamma 65-imi aalajangersakkat sanioqqussinnaavai.”

012. § 25, imm. 1 imatut oqaasertalerneqassaaq:

“ Namminersorlutik Oqartussat kommunellu ilaqutariinnut arlalinnut illuutaat, tassaasut illut quleriinnik initallit, illut sanileriit illullu uiguleriit ikinnerpaamik pingasunik atasunik inissiarallit, najugaqatigiiffinnut aningaasaqarnikkut imminnut ingerlattunut agguarneqarsinnaapput.”

013. § 25, imm. 3 imatut oqaasertalerneqassaaq:

“ *Imm. 3.* Naalakkersuisut Namminersorlutik Oqartussat kommunellu ilaqutariinnut arlalinnut illuutaasa najugaqatigiiffinnut agguarneqarnissaat, najugaqatigiiffinni siulersuisunut qinersisarneq najugaqatigiiffinnilu siulersuisut sulinerat, matumani ilanngullugit najugaqatigiiffinni siulersuisut najugaqartunut aningaasaliissutinik atuinnissaannut maleruagassat pillugit aalajangersaasinnaapput.”

014. § 27, imm. 2 imatut oqaasertalerneqassaaq:

“ *Imm. 2.* Naalakkersuisut najugaqartut sinniisissaannik qinersisarneq najugaqartullu sinniisaasa sulinerat, taassuma ataani taakku illuutini attartortittakkani namminersortuni pigisani sunniuteqaqataasinnaanerit pillugu maleruagassiorsinnaapput.”

015. §§ 28-32-mut immikkoortumi qulequtaq imatut oqaasertalerneqassaaq:

“*Namminersorlutik Oqartussat kommunellu inissiaataat attartortittakkat*”

016. § 28, imm. 1 imatut oqaasertalerneqassaaq:

“ Namminersorlutik Oqartussat kommunellu ilaqutariinnut arlalinnut illuutaanni najugaqatigiiffimmi inissianik attartortitsinermit isertitat tamakkiisut sukulluunniit annertussusilerneqarnerini, najugaqatigiiffiup aningaasartuutinik tamanik akiliisinnaanissaa periarfissinneqassaaq, matumani ilanngullugit aningaasaliissutinik iluanaarutunut illumik piginnittumut akiliutitut aningaasartuutit, tak. § 31, aamma ingerlatsinermit atatillugu aningaasartuutit, matumani ilanngullugit allaffissornikkut aqutsinermit akiliutit, tak. § 32, imm. 1-6, aserorterisarnermik pinaveersaartitsinermit akiliutit, tak. § 32, imm. 7, aamma akiliutissatut illuuartitallu aalajangikkat.”

017. § 28, imm. 5 imatut oqaasertalerneqassaaq:

“ *Imm. 5.* Naalakkersuisut pilersaarutaasumik aserfallatsaaliuinissamut teknikikkullu atortulersuutinik nutarterinissamut illuuartitsisarneq, ineqarnermut akiliutip naatsorsorneqartarnera aamma ineqarnermut akiliutip iluarsineqarnissaanut siumoortumik ilisimatitsisarneq pillugu maleruagassiorsinnaapput.”

018. § 29, imm. 1 imatut oqaasertalerneqassaaq:

“ Namminersorlutik Oqartussat kommunellu ilaqutariinnut arlalinnut illuutai kingusinnerpaamik 2010-mi imermut uuttuusersorneqarsimassapput, taamaalilluni illuummi imermik nillertumik kissartumillu atuinermit tamakkiisumut aningaasartuutinut naatsorsukkat immikkut atuineq malillugu attartukkanut ataasiakkaanut agguanneqarsinnaassallutik, taamaattorli tak. imm. 2.”

019. § 30, imm. 1-2 imatut oqaasertalerneqassapput:

“ Ilaqutariinnut ataatsinut illut illullu affarleriit Namminersorlutik Oqartussanit kommunenillu pigineqartut ingerlatsinermit aserfallatsaaliuinernullu immikkoortortaarfimmut, aningaasaqarnikkut imminnut ingerlattunut agguarneqassapput. Kommunep ilaqutariinnut ataatsinut illut illullu affarleriit ingerlatsinermit aserfallatsaaliuinernullu immikkoortortaarfimmut

ataatsimut amerlanerusunulluunniit agguassavai. Ilaqutariinnut ataatsinut illut illullu affarleriit Namminersorlutik Oqartussanit pigineqartut ingerlatsinermit aserfallatsaaliuinernullu immikkoortortaqaqfimmumut, Kalaallit Nunaanni ilaqutariinnut ataatsinut illunik illunillu affarleriinnit Namminersorlutik Oqartussanit pigineqartunit tamanit peqataaffigineqartumut ataatsimoortinneqassapput, matumanili Naalakkersuisunut pisortanullu inissiat, tak. § 14, imm. 1, ingerlatsinermit aserfallatsaaliuinernullu immikkoortortaqaqfimmumut imminut ingerlattumut, tak. § 14, imm. 4, inissinneqartut pineqanngillat.

Imm. 2. Namminersorlutik Oqartussat kommunellu ilaqutariinnut ataatsinut illuutaanni illuutaannilu affarleriinni ingerlatsinermit aserfallatsaaliuinernullu immikkoortortaqaqfiup inissiaataanik attartortitsinermit akiliutip sukkulluunniit annertussusilerneqarnerani, ingerlatsinermit aserfallatsaaliuinernullu immikkoortortaqaqfiup aningaasaliissutinit iluanaarutinit aningaasartuutinit, tak. § 31, aamma ingerlatsinermit aningaasartuutinit inissiamik piginnittumut akiliisinaanissaa periarfissinneqassaaq, matumani ilanngullugit allaffissornikkut aqutsinermit akiliutit, tak. § 32, imm. 1-6, matumani aningaasartuutit attartortumit toqqaannartumik akilerneqartut pinnagit, tak. imm. 7.”

020. § 30, imm. 8 imatut oqaasertalerneqassaaq:

“ *Imm. 8.* Naalakkersuisut pilersaarutaasumik aserfallatsaaliuinissamut teknikikkullu atortulersuutinit nutarterinissamut illuartitsisarneq, ineqarnermit akiliutip naatsorsorneqartarnera aamma ineqarnermit akiliutip iluarsivigineqartarnissaanut siumoortumik ilisimatitsisarneq pillugu maleruagassiorsinnaapput.”

021. § 31, imm. 1 imatut oqaasertalerneqassaaq:

“ Ukiumoortumik Namminersorlutik Oqartussat kommunellu aningaasaliissutinit iluanaarutissaat illuutip sananeranut akiusup 1,5%-iannik annertussuseqassaaq.”

022. § 31, imm. 7 imatut oqaasertalerneqassaaq:

“ *Imm. 7.* Naalakkersuisut imm. 3 aamma 4 malillugu teknikimut aningaasaqarnernullu naliliinissap qanoq ingerlanneqarnissaa pillugu maleruagassiorsinnaapput.”

023. § 32, imm. 6-8 imatut oqaasertalerneqassapput:

“ *Imm. 6.* Naalakkersuisut Namminersorlutik Oqartussat kommunellu inissiaataasa attartortittakkat allaffissornikkut aqunneqarnerat ingerlanneqarnerallu, matumani ilanngullugit ilaatigut allaffissornikkut aqutsinermit akiliutip immikkoortui, tunngaviusumik ilassutitullu sullissinerit immikkoortiterneri, akiliutit kiffartuussinernullu akiliutit immikkoortiterneri, aningaasaliissutinit allaffissornikkut aqutsineq, missingersuusiorneq, naatsorsuutinit saqqummiussisarneq kukkunersiunerlu pillugit maleruagassiorsinnaapput.

Imm. 7. Attartortitsisup Namminersorlutik Oqartussat kommunellu ilaqutariinnut arlalinnut illuutaanni attartortut akiliisissinnaavai, najugaqatigiiffimmi aserortersarnermik pinaveersaartitsinermit atatillugu aningaasartuutinit naleqquttunut matussutissanik.

Imm. 8. Attartortitsisup inissiaataasa inissisimaffiannut pitsanngorsaanissamut imaluunniit aningaasaleeqinnissamut aningaasartuutitut matussutissanik attartortitsisoq Namminersorlutik Oqartussat kommunillu ilaqutariinnut arlalinnut illuutaanni attartortunut akiliisitsisinnaavoq. Akiliutissap annertussusissaa ukiumi pineqartumi Inatsisartut aningaasanut inatsisaanni oqaasertaliussinikkut annertussusilerneqassaaq.”

024. § 33, imm. 4 imatut oqaasertalerneqassaaq:

“ *Imm. 4.* Illuutip teknikikkut aningaasaqarnikkullu nalingata naatsorsorneqarnerani periaatsit Naalakkersuisunit aalajangersarneqartut malinneqassapput, tak. § 31, imm. 7.”

025. § 37, imm. 1 imatut oqaasertalerneqassaaq:

“ Attartornerup aallartinnerani Namminersorlutik Oqartussat kommunellu inissiaataanni attartortittakkani attartortut qularnaveeqqusiissut, qaammatini pingasuni ineqarnermut akiliutissap annertoqataanik annertussusilerneqartoq attartortitsisumut tamakkerlugu akilissavaat. Attartortup attartornerup aallartinnerani qularnaveeqqusiissutissaq tamakkerlugu akilersinnaangikkuniuk, attartortup akiligassaq qaammatinut aqqaneq-marlunnut angeqqatigiinnut aggorlugu qaammatikkaartumik akilersorsinnaavaa, tak. imm. 7.”

026. § 37, imm. 7 imatut oqaasertalerneqassaaq:

“ *Imm. 7.* Naalakkersuisut qularnaveeqqusiissuteqartarnek pillugu maleruagassiorsinnaapput.”

027. § 41, imm. 4 imatut oqaasertalerneqassaaq:

“ *Imm. 4.* Naalakkersuisut kiassarnermut naatsorsuusiorneq, aningaasartuutit attartortunut agguarneqartarnerat, akiliisarnek aamma kiassarnermut akiliutissat iluarsiivigineqartarnerat pillugit maleruagassiorsinnaapput.”

028. § 44, imm. 6 imatut oqaasertalerneqassaaq:

“ *Imm. 6.* Naalakkersuisut atuaasarneq imermullu atukkamut akiliisitsisarnek, kiisalu imermut naatsorsuusiortarnek pillugu sukumiisunik maleruagassiorsinnaapput.”

029. § 45, imm. 1 imatut oqaasertalerneqassaaq:

“ Namminersorlutik Oqartussat kommunillu inissiaataanni attartortittakkani illuutit attartortitallu isumannaatsumik aserfallatsaaliorneqarnissaasa isumagineqarnissaa attartortitsisup pisussaaffigaa.”

030. § 51, imm. 1 imatut oqaasertalerneqassaaq:

“ Namminersorlutik Oqartussat imaluunniit kommunet inissiaataanni attartortittakkani attartortoq siumoortumik attartortitsisoq akuersiteqqaarlugu nammineq akilikkaminik attartukkami atortulersuutinik nalinginnaasunik ikkussuinissamut pisinnaatitaavoq, tamatumani attartortitsisup illuutip innaallagissamut kuuffinnullu atortuisa pisinnaasai atortulersuutitut naammangitsut qularnaarsimangippagu.”

031. § 52, imm. 1 imatut oqaasertalerneqassaaq:

“ Namminersorlutik Oqartussat kommunellu inissiaataanni attartortittakkani attartortut kommunemi najukkamilu pilersaarutit ataqqillugit ataasiakkaarlutik imaluunniit ataatsimoorlutik illumi attartortitsisup innersuussineratigut radiop TV-llu aallakaatitaannik tigooqqaanissamut radiomut fjernsynimulluunniit antenniliisinaatitaapput, taamaattorli tak. imm. 2. Taamatuttaaq attartortut illumi radiup TV-llu aallakaatitaannik isiginnaarnissamut kabelikkut attaviliisinaatitaapput, najugaqarfimmi TV-mut kabelinut attaviliinissaq periarfissaqarpat.”

032. §§ 53-55 imatut oqaasertalerneqassapput:

“ § 53. Namminersorlutik Oqartussat inissiaataanni attartortittakkami attartortoq attartortitsisoq siumut allakkatigut akuersissuteqarteqqaarlugu inunnik isumaginninnermi inatsisini aalajangersakkat malillugit iluaqusersuutinik ikkussuisinnaatitaavoq. Attartortitsisup attartortoq attartukkaminik qimatsinermini inissiap pissusiatut pilersitseqqinnissaa aamma kommunalbestyrelsi inissiap pissusaatut pilersitseqqinnermut aningaasartuutit akilerneqarnissaannut qularnaveeqqusiinissaa piumasaqaatigisinnaavaa. Attartortup attartortitsisoq iluaqusersuutit ikkussuunneqannginneranni kingusinnerpaamik sapaatit akunnerinik arfinilinnik sioqqutsilluni ilisimatitsissuteqarfigissavaa.

§ 54. Namminersorlutik Oqartussat kommunelluunniit inissiaataanni attartortittakkami attartortoq ajoqusikkanut, attartortut ataasiakkaat §§ 51 aamma 52 malillugit ikkussuussimasaannik pissuteqartunut taarsiinissamut akisussaavoq.

Imm. 2. Attartortup taarsiisussaatitaanera iluarseeqqinnermi imaluunniit attartortitsisup atortulersuutinik tiguserani atorunnaassaaq.

§ 55. Namminersorlutik Oqartussat kommunelluunniit inissiaataanni attartortittakkami attartortoq attartortitsisumit siumut allaganngorlugi akuersissummik peqqaarluni inissiami silataanilu erseqqissumik aalajangikkanik pitsanngorasaannaatitaavoq il.il., inissiamiillu nuunnermini aningaasartuutigisimasani uppersaasernerqartut aningaasanngorlugit taarsertinnissaannut pisinnaatitaalluni, tak. §§ 56 aamma 57.

Imm. 2. Attartortoq attartortitsisumit akuerineqarani attartukkamik allannngortiterisimappat, attartortoq attartortitsisumut tamanna pillugu taarsiissuteqarnissamut akisussaatinneqassaaq.”

033. § 57 imatut oqaasertalerneqassaaq:

“ § 57. Naalackersuisut attartortup pitsanngoraavigisinnaasai suliarisinnaasaalu allat, naatsorsuisarneq ajunngitsorsiassanullu akiliisarneq pillugu sukumiinerusunik maleruagassiorsinnaapput.

Imm. 2. Attartortitsisoq §§ 51 aamma 55 naapertorlugit qinnuteqaatinik suliarinninnerminut sullissinnermut akiliuteqartoqarnissaanik piumasaqarsinnaavoq. Naalackersuisuniit sullissinnermut

akiliutip annertussusissaa aalajangerneqassaaq. Sullissinermut akiliutissaaq qinnuteqaatip tunniunneqarnerani akilerneqassaaq.”

034. § 58, imm. 4 imatut oqaasertalerneqassaaq:

“ *Imm. 4.* Namminersorlutik Oqartussat kommuunillu inissiaataanni attartortittakkani najugaqartut inigisaminnik allamut attartortitsigallarnissamut taarsiullugu pisinnaatitaapput, piffissap peqarfiginngisassamik naanerani inissiamut allamut innersuunneqarnissamut qularnaveeqqusiivigineqarsinnaagunik attartornerminnik unitsitsinissamut, tak. § 5, imm. 1, nr. 3.”

035. § 58, imm. 8 imatut oqaasertalerneqassaaq:

“ *Imm. 8.* Naalakkersuisut attartukkamik attartortitsigallarneq ineqarnermullu qularnaveeqqusiissut pillugit maleruagassiorsinnaapput.”

036. § 59, imm. 1 imatut oqaasertalerneqassaaq:

“ Namminersorlutik Oqartussat kommunelluunniit inissiaataanni attartortittakkani attartortut nammineq kissaatigalugu nuunnissamut allattuiffimmut allatsissinnaapput.”

037. § 59, imm. 8 imatut oqaasertalerneqassaaq:

“ *Imm. 8.* Namminerisamik kissaateqarluni nuussinnaaneq aamma inigisamik paarlaasseqatigiissinnaaneq pillugit Naalakkersuisut maleruagassanik erseqqinnerusunik aalajangersaasinnaapput.”

038. § 68, imm. 1 imatut oqaasertalerneqassaaq:

“ Namminersorlutik Oqartussat imaluunniit kommunep inissiamik attartukkamik nutarterinissaaq isaterinissarluunniit pissutigalugu attartorneq atorunnaarsissappagu, tak. § 67, nr. 2, attartortoq inissiamik taartissamik innersuussivigineqassaaq, tak. § 5, imm. 1, nr. 1. Inissiamik taartissamik innersuussisusaatitaaneq taamaallaat atuutissaaq, attartortup attartornermut isumaqatigiissummi Namminersorlutik Oqartussanit kommunemilluunniit attartornermik atorunnaarsitsinerup nalaani attartornissamik isumaqatigiissummik attartortoq eqqortitsisimappat.”

039. § 69, imm. 2 imatut oqaasertalerneqassaaq:

“ *Imm. 2.* Attartortup atorunnaarsitsissut akueriumangikkuniuk, attartortoq atorunnaarsitsissut tip tigueneraniit sapaatit akunneri arfinillit qaangiutsinnagit allakkatigut akerliliissuteqassaaq. Attartortitsisup atorunnaarsitsissut atuutsiinnarniarlugu kissaatigiguniuk, attartortitsisoq sapaatit akunneri qaavatigut arfinillit qaangiutsinnagit eqqartuussivimmi suliassanngortitsissaaq. § 67, nr. 2 aamma 3 naapertorlugit Namminersorlutik Oqartussat kommunellu inissiaataanni attartortittakkani attartornermik atorunnaarsitsinermut akerliliissut kinguartitsigallarnermik kinguneqarsinnaanngilaq.”

040. § 76, imm. 3 imatut oqaasertalerneqassaaq:

“ *Imm. 3.* Naalackersuisut Namminersorlutik Oqartussat kommunellu inissiaataanni attartortittakkani attartornermik atorunnaarsitsisarneq pillugu maleruagassiussapput.”

041. § 77, imm. 5 imatut oqaasertalerneqassaaq:

“ *Imm. 5.* Naalackersuisut inissiamit aninermi nalinginnaasumik iluarsaassisarneq aamma attartortup tamatumunnga atatillugu aningaasartuutigisaanut ajunngitsorsiassaqaqtarneq pillugu maleruagassiorsinnaapput.”

042. § 81 imatut oqaasertalerneqassaaq:

“ **§ 81.** Namminersorlutik Oqartussat kommuneluunniit inissianik allaffissornikkut aqutsisussamik avataaniit pissarsisimappat, Naalackersuisut imaluunniit Kommunalbestyrelsep nakkutigissavaa, inissianik allaffissornikkut aqutsisup suliani Inatsisartut peqqussutaat manna aamma aalajangersakkat peqqussut manna naapertorlugu suliarineqartut naapertorlugit suliarinerai.

Imm. 2. Kommune namminee.rluni inissiaatiminik allaffissornikkut aqutsinermik isumaginnittuuguni, kommunep suliani Inatsisartut peqqussutaat manna aamma aalajangersakkat peqqussut manna naapertorlugu suliarineqartut naapertorlugit isumagissavai.

Imm. 3. Namminersorlutik Oqartussat kommuneluunniit aningaasatigut nakkutilliisussaataani, tak. imm. 1, naammassiniarlugu inissianik allaffissornikkut aqutsisup kukkunersiuisua inissianik allaffissornikkut aqutsisup suliani Inatsisartut peqqussutaat manna aamma aalajangersakkat peqqussut manna naapertorlugu suliarineqartut naapertorlugit suliarinerai nalunaarusiortissinnaavaa.

Imm. 4. Kommunep inissiaatiminik nammineq allaffissornikkut aqutsisup ukiumoortumik suliasat Inatsisartut peqqussutaat manna aamma aalajangersakkat peqqussut manna naapertorlugu suliarineqartut naapertorlugit isumagineqarnerat pillugu kukkunersiuisuni ukiumoortumik nalunaarusiortittassavaa.

Imm. 5. Namminersorlutik Oqartussat imaluunniip kommunip imm. 1 naapertorlugu nakkutilliinera ilaatigut aningaasatigut ingerlatsinermik nakkutilliinermut ilaatigullu avataaniit aqutsisup allaffissornermi suliasaanik allanik nakkutilliinermut tunngasuvoq.

Imm. 6. Naalackersuisut Namminersorlutik Oqartussat kommunellu inissiaataat attartortittakkat najugaqatigiiffiillu nakkutigineqarnerat, matumani ilanngullugit inissianik piginnittup imaluunniit aqutsisup aningaasaatinik aqutsinera, missingersuusiortarnera, naatsorsuutininik saqqummiisarnera kukkunersiuisoqarneralu, pillugu maleruagassiorsinnaapput.”

043. §§ 82-83 imatut oqaasertalerneqassapput:

“ **§ 82.** Namminersorlutik Oqartussat kommunellu inissiaataanni attartortittakkani attartortut attartortitsisullu akornanni aaqqiagiinngissutit, tak. § 84, suliarineqarnissaannut Naalackersuisut ineqarneq pillugu maalaaruteqartarfimmik pilersitsisinnaapput, taannalu siulittaasoqassaaq maalaaruteqartarfimmilu pingasunik nalinginnaasunik ilaasortaqaqassalluni.

Imm. 2. Siulittaasoq taassumalu sinniisissaa Naalackersuisup ineqarneq pillugu suliasaqaarfimmut akisussaasuusup innersuussuteqarneratigut Naalackersuisunit toqqarneqassapput, taakkulu

marluullutik ineqarnermi pissutsinut immikkut ilisimasaqassapput imaluunniit inatsisilerituutut soraarummeersimassallutik. Maalaaruteqartarfimmut ilaasortaq ataaseq taassumalu sinniisissaa INI A/S-p innersuussuteqarneratigut Naalakkersuisunit toqqarneqassapput. Maalaaruteqartarfimmut ilaasortaq ataaseq taassumalu sinniisissaa kommunet ataatsimoorussillutik inassuteqarneratigut Naalakkersuisunit toqqarneqassapput, aammalu maalaaruteqartarfimmut ilaasortaq ataaseq taassumalu sinniisissaa Ineqartut Peqatigiiffiisa Kattuffiata IPK-p inassuteqarneratigut Naalakkersuisunit toqqarneqassallutik, taamaattorli tak. imm. 6. Maalaaruteqartarfimmut ilaasortat pingasut nalinginnaasut taakkulu sinniisissaat ineqarneq pillugu sulianut tunngasunik ilisimasaqassapput.

Imm. 3. Siulittaasumik, ilaasortanik sinniisissanillu toqqaaneq ukiut sisamat tikillugit atuuttassaaq.

Imm. 4. Siulittaasoq sinniisissaaluunniit piginnittut kattuffiannut, inissiaatileqatigiit kattuffiannut imaluunniit attartortut kattuffiannut immikkut attuumassuteqartuussangilaq, imaluunniit inuussutissarsiutigalugu illuutininik nioqquteqarnermut akuliussimasuussanani.

Imm. 5. Maalaaruteqartarfimmut ilaasortaq sinniisussaaluunniit pissusissamisoortumik aggersarneqareernermini maalaaruteqartarfimmut aggernissamut pisussaataivoq. Naalakkersuisut ineqaneq pillugu maalaaruteqartarfimmi ataatsimiinnissamut takkutinnitsoornerup kingunerisassai pillugit sukumiinerusunik maleruagassiorsinnaapput.

Imm. 6. IPK maalaaruteqartarfimmut ilaasortassamik toqqaanngippat, maalaaruteqartarfimmut ilaasortassamik innersuussisinnaataaneq suliniaqatigiiffinnut ukununnga, taaneqartut tulleriiaarneri malillugit tutsinneqassaaq: SIK, IMAK aamma PPK.

§ 83. Naalakkersuisut maalaaruteqartarfiup atortussatut pisariaqartitaannik atugassiissapput, aammalu pisariaqartitsinikkut allaffeqarfimmiit ikiorneqarnissaat isumagissallugu.

Imm. 2. Maalaaruteqartarfiup sulineranut aningaasartuutit Naalakkersuisunit akilerneqartassapput, matumani ilanngullugit siulittaasup ilaasortallu suliannut atatillugu akiliussigallarnerannut, tak. imm. 5, kiisalu allaffissornermut il.il. aningaasartuutit. Ineqarneq pillugu maalaaruteqartarfimmi ilaasortat Inatsisartunut, Naalakkersuisunut il.il. ilaasortat akissarsiaqartitaanerit pillugu Inatsisartut inatsisaanni maleruagassat naapertorlugit akissarsiaqartinneqassapput, ullormusiaqartinneqarlutik angalanermilu aningaasartuutininut ajunngitsorsiassaqartinneqassallutik. Aningaasartuutit taakku ukiumoortumik Nunap Karsianit tapiissutigineqartut iluanniit akilerneqartassapput.

Imm. 3. Maalaaruteqartarfik oqarasuaatit atorlugit ataatsimiissinnaavoq, maalaaruteqartarfimmi ilaasortat tamarmik illoqarfimmi, maalaaruteqartarfiup allattoqarfeqarfigisaani najugaqanngippata.

Imm. 4. Ineqarneq pillugu maalaaruteqartarfik ukiumoortumik nalunaarummik saqqummiussisassaaq, ilaatigut suliassat takkuttut suliannu naammassineqartut pillugit kisitsisitigut takussutissanik, kiisalu aalajangiisarnerit ataasiakkaat inernerinik naatsunngorlugit saqqummiunneqarnerinik imaqartunik.

Imm. 5. Aningaasartuutininut imm. 2-mi taaneqartunut matussutissatut, Naalakkersuisut attartortitsisoq peqqusinnaavaat ukiumoortumik ineqarnermut akiliutit aqqutigalugit akiliutissat attartortunut ataasiakkaanut akilerseqqullugit akileqqullugillu. Attartortitsisup akiliutissat ukiumi

akiliiffiusussami kingusinnerpaamik januaarip ulluissa 31-anni Naalakkersuisunut akilissavai. Akiliutissaq piffissaq eqqorlugu akilerneqanngippat, Naalakkersuisut missingiillutik pisassanik attartortitsisumut ilanngaateqarsinnaapput. Akiliutissaq ukiumoortumik Inatsisartut aningaasanut inatsisaannut oqaasertaliinikkut annertussusilerneqartassaaq.

Imm. 6. Naalakkersuisut maalaaruteqartarfiup suliai, matumani ilanngullugit ataatsimiittarnerit akuttussusissaat suleriaasissarlu pillugit sukumiinerusunik maleruagassiorsinnaapput.”

044. § 85, imm. 7 imatut oqaasertalerneqassaaq:

“ *Imm. 7.* Siulittaasup maalaaruteqartarfiup allattoqarfia noqqaaffigisinnaavaa inissiaq maalaarutigineqartoq suliamut attuumassuteqanngitsunit takuniarlugu misissorteqqullugu. Suliami pineqarlutik ilaasut sivikinnerpaamik sapaatip akunnera ataaseq sioqqullugu aggersarneqassapput. Takuniaalluni misissuinermut aningaasartuutit Naalakkersuisunit akilerneqassapput.”

045. § 86, imm. 6 imatut oqaasertalerneqassaaq:

“ *Imm. 6.* Ineqarneq pillugu maalaaruteqartarfiup aalajangiineri Namminersorlutik Oqartussanut kommunenullu, inissianik attartortitsisuusunut pinngitsoorani malinneqassapput. Namminersorlutik Oqartussat kommuneluunniit avataaniit allaffissornikkut aqutsisumik isumaginnittuutitaqarpata, maalaaruteqartarfiup aalajangiineri aamma taakkununnga pinngitsoorani malinneqassapput.”

§ 2-mut

6. § 2 imatut oqaasertalerneqassaaq:

“ § 2.

Inatsisartut inatsisaat ullormi 1. januar 2022 atuutilissaaq.

Imm. 2. § 1, nr. 1 aamma 2 piffissaq atuutilerfissaat pillugu Naalakkersuisut tamanna pillugu nalunaarutikkut aalajangersaanerisigut pissaaq.”

Allannguutissatut siunnersuummut oqaaseqaatit

Nalinginnaasumik oqaaseqaatit

Allannguutissatut siunnersuut saqqummiunneqarpoq inatsisissatut siunnersuutip kalaallisut allaqqanerani amigaataasut ataasiakkaat, tassunga ilanngullugu inatsisissatut siunnersuummi § 1, nr. 4-mi teknikkikkut naleqqutinngitsut aaqqiivigineqaaqqullugit.

Allannguutissatut siunnersuummi nr. 1-3 kalaallisut allanneqarnerani amigaataasut iluarsiivigineqarput, taamaalillunilu inatsisissatut siunnersuutip danskisut allanneqarnerani allannguutininik kinguneqassanani. Tamatuma assinganik allannguutissatut siunnersuummi nr. 6-imut atuuppoq.

Allannguutissatut siunnersuutip nr. 4-5 inatsisissatut siunnersuutip § 1, nr. 4-mut attuumassuteqartumut teknikkikkut naleqqutinngitsut aaqqiivigineqarput.

Allannguutissatut siunnersuutip nr. 4-5 inatsisissatut siunnersuutip imarisaanik allannguineramik kinguneqanngilaq, taamaallaalli inatsisissatut siunnersuutip ilusaanik.

Allannguutissatulli siunnersuutip oqaasertalernerani Inatsisartut peqqussutaanni § 82-imi Ineqarneq pillugu maalaaruteqartarfik pillugu KANUKOKAp atorunnaarsinneqarnikuunerata kingunerisaanik ilassutitut allannguut ilanngunneqarpoq. Inatsisartut peqqussutaanni atuuttumi § 82, imm. 2 oqaaseqatigiit pingajuanni aalajangersarneqarpoq maalaaruteqartarfimmi ilaasortaq ataaseq tassungalu sinniisussaq KANUKOKA-mit innersuussisoqareerneratigut toqqarneqassasut. Allannguutissatut siunnersuutip kingunerissavaa innersuussisinnaatitaaneq taassuma ”kommunet ataatsimoorussillutik” innersuussisinnaatitaalerneranik nuussineq. Taamatut aaqqiineq allannguutissatut inatsisini arlaqartuni atorneqarpoq, ass. Avatangiisit innarlitsaaliorneqarnissaanik Inatsisartut inatsisaata allanngortinneqarnissaa pillugu Inatsisartut inatsisaat nr. 10, 27. november 2018-imeersoq (KANUKOKA-p atorunnaarsinneqarnerata malitsigisaanik allanngortitsineq).

Inatsisissatut siunnersuummi aalajangersakkanut ataasiakkaanut oqaaseqaatit

Nr. 1-3-imut

Allannguutissatut siunnersuummi nalinginnaasumik oqaaseqaatit innersuunneqarput.

Nr. 4-5-imut

Allannguutissatut siunnersuummi nalinginnaasumik oqaaseqaatit innersuunneqarput.

Nr. 6-imut

Allannguutissatut siunnersuummi nalinginnaasumik oqaaseqaatit innersuunneqarput.